



*L'esperianza s'ensegna, che oreibun n'ô nia di se ciarê önn al ater, mo ciarê deboriada tla medema direziun.*  
(Antoine de Saint-Exupery)

La ploania ti fej a düc i per de nosta comunità co recorda sü **25, 30, 35, 40, 45, 50 y 55 agn de matrimone** les miús aodanzas de fortüna y benedisciun por i agn co á da gní: **Idio sii graziont co Os y Ves benedesci!**



*“Signur, confermeia söa empormetüda d'amur önn por l'ater.”*

La ploania i fej les miús aodanzas de benedisciun y fortüna ai nüc **Daive Brandlechner y Astrid Ladstätter** co se dá adöm tal sacramont dal matrimone en sabeda ai 22 de setember a La Pli.

## 1 enformaziuns y termins

**Oraziun da Taizé:** la proscima oraziun de Taizé ven tignida en vendres ai 21 de setember ales 20:00 tla capela a Oies. Al se trata de en n'ora olá ch'al ven perié, medité y cianté en forma de Taizé. Düc é der bel enviés a tó pert.

**Biblioteca:** la Biblioteca “Angelo Trebo”, envieia en sabeda, ai 22 de setember ales 15:00 i scolari y les scolares co á tut pert al'aziun da d'isté, da gni ala festa de concluiun te biblioteca a Al Plan con i clowns Merendina y Sälly. Al sará ince la ola dla fortüna. I s'aspetun!

**Sorvisc ai Jogn:** le SaJ Val Badia adöm ala Ciasa dal Parch Natural Fanes-Sennes-Braies envieia en sabeda, ai 22 de setember a na jita acompagnada al Ander de Conturines, por düc i residenc dla Val Badia. Al é ca. 7 ores da jí con 1.200 m de deslivel. Punt d'encuntada: 8:30 ala Capanna Alpina a San Ciascian. Iscriziuns te Sorvisc ai Jogn, ☎ 0474 523070 anter la jöbia, ai 20 de setember. Cost: debann.

**Ocio:** le Comun lascia alessei che la **strada Frena** alta fora romagn slüta dai 17 de setember por en n'edema y la **strada Pliscia - Peraforada** dai 24 de setember por en'edema.

<b>Döt le bun a:</b>	Franz Trebo, <i>Desproch</i>	* 17.09.1926
	Maria Candida Trebo Maneschg	* 17.09.1936
	Mateo Ellecosta, <i>Ehrenburg</i>	* 19.09.1931
	Iaco Pedevilla	* 19.09.1936
	y a düc chi co á santennom y complesc i agn cöst'edema	

**Impressum:** Ploania d'La Pli; redaziun Franz Rigo y Edith Willeit  
**Comunicaziuns** **cina le dedemesaledema** sera a Franz Rigo: ☎ 0474 500978 o ✉ ploania@gmx.net  
**Download plata:** [www.unitepastorala.org](http://www.unitepastorala.org)



## Chel co ô mo gní do, chel s'an desdiji de se enstes toli söa crusc sön el y mo vegni do

☞ Is 50, 5–9 | Iaco 2, 14–18 | Mc 8, 27–35

### Dal Vangelo do San Merch:

Te chel tomp <sup>27</sup>é Gejú jü con sü discepui tai paisc dlungia Zesarea de Filipus. Sön tru ál damané i discepui: Che dij pa la jont che iu sun? <sup>28</sup>Ai ti á dit: Valch Jan Batista, d'atri Elía, endò d'atri n ater dai profec. <sup>29</sup>Danló i ál damané: Os endere, che dijeise pa os che iu sun? Sciomun Pire ti á respognü: Tò es le Messia! <sup>30</sup>Mo el ti á proibí de baié con zacai porsora el. <sup>31</sup>Spo ál motü man da i istruí che le Fi dal Om messará patí trep y gnará refodé dai plü vedli, dai gragn prei y dai stüdiés dla lege; al gnará copé, mo do da trei dis ressoriarál. <sup>32</sup>Y al baiâ davert daldöt de cösc. Danló l'á Pire tut da na pert y á motü man da le brunteré. <sup>33</sup>Gejú s'á ôt y ti á ciaré ados a sü discepui y á amoní Pire con les parores: Vátan demez da me, sátann! Deache tö ne n'as nia enmont ci che Dio ô, mo ci che la jont ô. <sup>34</sup>Al á cherdé adalarch la meja de jont y i discepui y á dit: Chel co ô mo gní do, chel s'an desdiji de se enstes toli söa crusc sön el y mo vegni do. <sup>35</sup>Deache chel, co ô salvé söa vita, la pordará; mo chel, che pordará söa vita por mia gauja y por gauja dal vangelo, la salvará.

### Oraziun dal de

*Periun! Dio, che t'as cherié y che te arvenes dötes les cosses, ciara graziont sön nos: fá ch'i te sorviunse con döt le cör y ch'i podunse sontí l'amur che t'as por nos.*

*Do cösc te periunse por nosc Signur Gejú Crist, to Fi, co é Dio y vir y regneia con te t'unité dal Spirit Sant por düc i secui dai secui. – Amen.*

(Lezionar B)



☞ Letöres dla 25. domegna ia por l'ann:

**Sap 2, 1a.12.17–20 | Iaco 3, 16–4, 3 | Mc 9, 30–37**

Edema liturgica dai 16.09. ai 23.09.2018

<b>DOM 16.</b>	<b>24. domegna ia por l'ann FESTA DAI IUBILEI DA NOZA</b>	<i>Cornel y Cyprian, Julia, Edith</i>
<b>08:30</b>	<b>gran messa</b> por i iubilars da noza y söes families	<i>oferta por i debojügn dla ploania</i>
10:00	<i>s.m. a Al Plan</i>	
<b>Lön 17.</b>	<i>Hildegard da Bingen, Robert Bellarmin</i>	
07:30	<i>s.m. a Al Plan</i>	
<b>Ded 18.</b>	<i>Lambert, Richard</i>	
<b>07:30</b>	<b>s.m.</b> d'aniversar por † Emilia Kastlunger, Alnei <b>s.m.</b> por †† omi y fomenes	
<b>Dem 19.</b>	<i>Januarius (Gennaro), Igor, Ferdinand</i>	
18:00	<i>s.m. a Al Plan</i>	
<b>Jöb 20.</b>	<i>Andreas Kim Taegon, Paul Chong Hasang y compagns</i>	
<b>19:30</b>	<b>s.m.</b> por † Agnese Ellecosta ved. Erlacher, Ombolt <b>s.m.</b> por vis y †† dla fam. Erlacher, Tomele	
<b>Ven 21.</b>	<b>fiesta de San Mateo apostul y evangelist,</b> <i>Debora</i>	
07:10	<i>s.m. a Al Plan</i>	
<b>Sab 22.</b>	<i>Maurizius y compagns, Tomesc, Jonas</i>	
<b>07:30</b>	<b>s.m.</b> en onú de San Padre Pio da Pietralcina <b>s.m.</b> por † Giovanni Ploner, La Munt	
<b>14:00</b>	<b>s.m. da noza de Davide Brandlechner y Astrid Ladstätter</b>	
18:00	<i>s.m. prefestia a Al Plan</i>	
<b>DOM 23.</b>	<b>25. domegna ia por l'ann</b>	<i>Pio da Pietralcina (Padre Pio), Tecla</i>
<b>08:30</b>	<b>gran messa</b> por döta la ploania	<i>oferta por i debojügn dla ploania</i>
10:00	<i>s.m. a Al Plan</i>	
<i>ampola:</i>	por †† prei y mognans	
<i>ministronc:</i>	▶ da doman y domegna: Laura Palfrader y Manuel Pedevilla ▶ da sera y domegna: David Willeit y Thomas Ellecosta	
<i>i recordun:</i>	Emilia Kastlunger Rosa Trebo Pedevilla, Cortina	+ 17.09.2015 + 22.09.2012



**Chi co davagna perd, chi co perd davagna (Mc 8, 27–35)**

**I ponsi do**

*Gejú met man da baié  
dla crusc. Al é n lingaz  
dür, con ieranzes  
stersces por chi co ô  
ester veramonter n  
discepul.  
I jí do a Gejú paress  
presc, aladô dal ponsé  
dla porsona, na desfata.  
Deperpo él en davagn y  
na realizaziun.  
Se dé ca por amur ad el  
y ai fredesc ti dá a  
nosta vita la derta  
sodesfaziun.*

**I preii ensciö**

I preii ensciö: Al n'é nai saurí da te capí, Gejú,  
dandadöt n'él nia saurí da te gní do, canche te báies  
de crusc y de sacrificze y damanes da s'an desdí da  
nos por se salvé. Al é n lingaz absurd, dalunc da  
nosc ponsé y tan atramonter co dötes les propostes  
ch'i aldiun vignedé. Al é empü' desco sce n alenadú  
dijess a sü sogadûs che sce ai ô davagné le  
campionat déssai ciaré da perde. O desco sce n om  
d'afars sciürass demez sü scioldi por roé pa n cunt  
rich te banca. T'es demorveia, Signur! I messun avei  
veramonter tan de fede te té por ester bogh da creie  
a döt cösc. Tö nes as dé la proa che töa parora é  
verité. Töa crusc pareia la fin, t'âs pordü töa vita.  
Mo tö es rosserí, vitoriûs cutra le mal y le picé y sen  
este tö le su Signur dla storia.

*Walter Cazzaniga, Parola amica – Il Vangelo della domenica per ragazzi*

**Matrimone y familia**

Desco l'el y la era se ralegreia önn por l'ater, ensciö se ralegreia Idio por nos, söes  
creatöres. Idio é amur. Tal matrimone y tla familia podunse sontí so amur y le  
scinché ennant.

*Dio á cherié le chescian do söa someia, do la someia de Dio l'ál cherié. Desco el y  
era i ál cherié. (Genesi 1,27)*

Idio nes á formé y nes á dé la vita con so fle. L'encuntada con el nes manten en  
vita. El, co é nosc Pere, orunse laldé:

O Dio, che te i stas dlungia ala jont, t'os che l'el y la era s'oi bun önn al ater.

**Te, o Dio, te laldunse.**

O Dio, tan gran y nia da capí, t'os che el y era se respeteii y s'onoreii.

**Te, o Dio, te laldunse.**

Dio su, t'es la fontana dal amur matrimonial.

**Te, o Dio, te laldunse.**

Dio trinitar, te endespres comunité tla desvalianza.

**Te, o Dio, te laldunse.**

Dio paziontus, te i das ai maridés la forza de se mantegní la fedelté.

**Te, o Dio, te laldunse.**

Dio misericordius, te i scinches ai mituns proteziun pa sü peri y söes umes.

**Te, o Dio, te laldunse.**

Dio alangrana, desco mituns co s'encanta, nes lasceste amiré töes opres.

**Te, o Dio, te laldunse.**